

PREMIO OZIERI di Letteratura Sarda

59^a Edizione 2018 – Scadenza 30 aprile 2018

BANDU DE CUNCURSU 2018

Su “Prèmiu de Otieri”, fundadu dae Tonino Ledda in su 1956, contivizat, dae como sessant’annos, atividades chi agiuant sa cultura, sa limba e sa literadura de Sardigna.

RÈGULAS DE PARTECIPATZIONE COMUNES A TOTU SAS SETZIONES

- Sos trabàglios divent giòmper a sa **Segreteria de su “Prèmiu Otieri” de Literadura Sarda – Via Ugo La Malfa, 28 – 07014 OZIERI (SS)**, intro sos tèrmines indicados (**s’at a tènnere contu de sa data de su timbru de sas postas**). Non fatedas racumandadas. Bos avitades ispesas e nois sas literas las retzimus etotu!
- Sunt ammissos a su Prèmiu trabàglios iscritos in d’ogni varietate de sa limba sarda, fintzas in sas *eteroglossias internas* e in sardu-corsu. Diat fàghere piaghene si s’autore leerat in cunsideru sas règulas chi a tempus sou at bogadu a pizu su Prèmiu. Cherfende, si podent finas impitare sas règulas ortogràficas de sa Limba Sarda Comuna (L.S.C.).
- **Sos trabàglios divent giùghere iscritu, in finitia e in d’ogni copia, nùmene e sambenadu de s’autore, data e logu de nàschida, s’indiritzu giustu e su nùmeru de telèfono (o s’*e-mail*) ue si diat chèrrere giuiladu pro d’ogni bisonzu. Su “Prèmiu Otieri”, dai temporios longos, no ammitit “pseudonimos” e anonimadu.**
- **Si podet imbiare finas calchi riga de “curriculum” e novas subra s’autore.**
- Totu sos trabàglios divent èssere imbiados in **9 (noe) còpias cabales, chi si potant lègere bene.**
- **Si racumandat de impitare fòglios de formadu A4 (cm. 21x29,7), lassende una doa de nessi duos (mezus tres) centimetros a s’ala manca, pro sa regolta chi s’at a fàghere.**
- Sas copias de sos tribaglios, dade nos las prontas a las partire pro las intregare a sa giuria (si est pius de unu fogliu, cosidelas cun d’unu puntu). **Agradessimus cussizos pro mezorare su Prèmiu. Ponide-nos-los a banda intro sa busta, chena los cosire a sos trabàglios chi imbiades a su cuncursu. Est agradessidu finas unu glossàriu de sas paraulas pius lichitas de idda ‘ostra, o nessi de sas chi bos parent pius nòdidas a las segnalare.**
- Totu sas fainas ant a èssere inèditas e non divent àere àpidu reconnoschimentos in àteros cuncursos literàrios **a sa die chi los sezis imbiende a nois.**
- **NOVIDADE DE IMPORTU MANNU:**
Si ‘enit bene, mandade puru, in pius, sos *files (in Word)* de sos trabàglios a s’*e-mail*: premiozieri@yahoo.it. Semus regogliende sas fainas bostras in su Centru de Documentatzione pro lis poder dare s’importu chi meritant. Finas sas fainas chi non ant a risultare premiadas, sunt una prenda manna a testimonia de su valore de sa limba nostra e pro nde cogliere sas paràulas chi si che sunt irmentighende. Si nd’ant a bogare a pizu sas cosas pius lichitas pro sos istudiosos de su faeddu Sardu, pro chi potant restare in sa mente e in su coro nostru e de sos ch’ant a bènnere. E de custu agiudu, bos semus riconnoschentes, ca sa faina nostra est bell’e che tota in manu a su voluntariadu de zente cuidadosa chi cheret bene (a s’indonu) a sa Sardigna.

SOS PRÈMIOS DE SU CUNCURSU

S’ant a dare prèmios in dinari a sos primos tres classificados de ogni setzione, e-i sas targase medaglias nòdidas cun s’imprenta de su Prèmiu. Podent finamentas èssere assignados prèmios ispetziales. Sas poesias e-i sos contados premiados paris cun cussos chi sa giuria dessignat de imprentare, podent èssere postos in su cuadernu annuale.

EMIGRADOS

In mesu a sos emigrados chi ant a resessire a leare reconocimentos in sas setziones de ocanu, ant a retzire sa “Coppa Messaggero Sardo” unu o pius autores.

“SPORT”

Unu premiu a banda est destinadu dai su Panathlon Club de Otieri a unu tribagliu a sèberu de sa Giuria chi contet sos valores ladinus de su *sport*, a fora de sas luas, de sos trobojos e de sas trassas chi a dies de oe lu sunt anneulende.

AVERTÈNTZIAS

Pro no èsser esclusos, dade cuidadu a sas regulas de su cuncursu, e pius de totu a su chi est evidentziadu.

SU GIUDÌTZIU DE SA GIURIA EST INSINDACÀBILE

SETZIONI

POESIA SARDA INÈDITA “Antoni Sanna”

Ogni cuncurrente podet imbiare una poesia a tema liberu (cun rima o chentza rima). Si devet imbiare finas **una còpia de sa tradutzione in limba italiana**, chi unu cras at a èsser posta a disponimentu de sos istudiosos. **Sos chi iscrient in saligheresu o in tabarchinu, divent imbiare finas 9 (noe) còpias de sa tradutzione in limba italiana.** Si racumandat de non nch’essire dae su limite de 40 (baranta) versos.

Foras de sa busta, bi devides iscriere: **Setzione Poesia Sarda Inèdita “Antoni Sanna”.**

PROSA “Anghelu Dettori”

Ogni cuncurrente podet imbiare unu contadu o cale si siat iscritu in prosa, a tema liberu. Sas fainas chi imbiades divent càbere, dae pius a mancu, in 5 (chimbe) pàginas iscritas a màchina o a computer (corpus 12). **Si devet imbiare finas una còpia de sa tradutzione in limba italiana.** Ogni còpia devet essere cosida e pronta a la seberare pro sa giuria. Foras de sa busta, bi devides iscriere: **Setzione Prosa “Anghelu Dettori”.**

TRA POESIA E CÀNTIGU “Antoni Cubeddu”

Destinada a sa poesia cantada o de cantare. Ogni cuncurrente podet imbiare unu cumponentu a tema liberu, sighende sos ischemas e sas formas poéticas e mètricas ligadas a sa traditzione (comente: **ninnidos, atitidos, gosos, modas, mutos, repentinas**, etc., etc.). In custa setzione non bi cheret sa tradutzione in limba italiana, ma **est agradessidu meda si nos imbiades unu glossàriu cantu pius completu.** Nos ant a fàghere piaghene, pro las contivizare in su Centru de Documentatzione, finas sas indicatziones chi s’autore nos cherzerat imbiare subra sos ischemas antigos e-i sas formas poeticas chi at impreadu, leende in cunsideru sas traditziones de Sardigna e finas cussas pius nòdidas de sa bidde de s’autore.

Foras de sa busta, bi devides iscriere: **Setzione “tra poesia e càntigu” “Antoni Cubeddu”.**

ÀTERAS AVERTÈNTZIAS

- A leare parte a su cuncursu est a s’indonu e non benit pedida tassa peruna
- Un’autore podet leare parte a una o a pius de una setzione de sas chi sunt in cuncursu
- Sos autores premiados cun su Primu Prèmiu podent torrare a bìnchere in cussa mantessi setzione solu a pustis de tres annos

- Sas fainas non benint torradas in segus e-i su Sòtziu si reservat ogni deretu de las publicare cando e comente podet capitare, finas in sa ràdio, in sa televisione e in Internet, chentza pagamentu perunu a s'autore. S'autore, pero, restat proprietàriu de sa faina chi at iscritu e nde podet dispònnere a piaghene sou.
- **A leare parte a su cuncursu, cheret nàrrere chi benint atzetadas in pienu dae s'autore sas règulas chi bos amus dadu a connòschere.**

PREMIATZIONE

Sa premiatzione at a bènnere fata s'ultimu sàpadu o dominiga de Cabidanni de su 2018. Avertimus dae como chi ant a retzire cun tempus una litera a domo inoro sos autores ebbia chi ant a leare reconnoschimentos dae sa giuria.

CENTRU DE DOCUMENTATZIONE

Semus cogliende sos trabaglios (manuscritos, liberos, fotografias, filmados e ateras cosas chi pertocant a sos poetes e a sos iscritores de Sardigna). Su Centru, oe, est una realidade. Semus remunzende inie totu su chi amus retzidu in sessant'annos e pius de impignu nostru e bostru, pro lu lassare in ereditade a sos òmines de oe e de unu cras chi cherfant barminare sas tramas de un'idea chi non morit. Chie cherferat, podet bìdere su trabàgliu fatu finas a como in su situ:

www.biblioteche.logudoro.org

S'atividade sighit annu pro annu, a cunfromma a sas possibilidades nostras, finas chi bi resultat totu su chi su Prèmiu at retzidu dai cando est nàschidu. B'at una duda: dae cando sos trabàglios beniant imbiados anònimos (finas a su 1980, pius a mancu), cun su pseudònimu o paranùmene o unu motu, non semper amus sos nùmenes ladinus de sos autores. Chie cherferat nos podet agiuare, pro dare su nùmene prètziu de s'autore a-i cussos trabàglios chi no l'ant. Si podet imbiare una litera a su Segretàriu, o finas un' *email* a: premiozieri@yahoo.it

Sos autores chi sun interessados a lassare, dae como o unu cras, a su Centru de Documentatzione, tota o in parte, sa produtzione literària e de documentos issoro, nos lu podent fàghere ischire cun sos mantessi mèdios, o telefonende a su Segretàriu a su numeru 079/770244 o 337 206052. Ant a faghene a manera chi abarrent, gai, a su prètziu de sa zente e pro chi resten bias sa limba nostra, sa poesia e-i sa literadura in limba sarda. Sa Sardigna at a torrare gràtzias pro su chi totus nois e bois, cun amore ladinu a sa Terra nostra, semus matanende die pro die in custa sienda manna.